

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E te parahi ra oia i nia i te mou'a ra o Oliveta, ua haere omoe maira ta'na mau pipi ia'na, e ua na ô maira, E faaite mai oe ia matou i te tupuraa o taua mau mea nei? e te tapao o to oe taeraa mai e te hopea o teie nei ao?" Mat. 24: 3.

"E tia mai hoi te tahi fenua e aro mai i te tahi fenua, e te tahi basileia e aro mai i te tahi basileia; e o'e hoi, e te ma'i, e e aueue fenua i tera vahi, i tera vahi. E matamehai ana'e râ teie nei mau mea no te pohe." Mat. 24: 7, 8.

Nu. 6.

10 Mati, 1909.

Mat. 2.

Te Ati Rahi i Itali

I te mahana 28 no Ditema i te hora 5 i te poipoi, ua aueue te tahi tufaa fenua rahi i Itali apatoa i tahatai e te fenua moana o Sicily, e ua pau e 35 oire, e ua pohe roa hoê hanere e ono ahuru ma pae tausani taata, e ua roohia mai te feia i tae mai no taua fenua ra e te ati poia e te toetoe e te mamae e te oto rahi i te hi'oraa i te pau rahi e i te imiraa i te mau fetii i moe i raro a'e i te mau pueraa fare i pau. Te taoto ra te rahi o te taata no taua fenua ra i te hora i aueue te fenua, e no te puai rahi o te aueueraa ua mairi te mau patu fare i raro, pohe roa atura te taata e rave rahi te tansaniraa, ua fifi te tahi pae taata i mairihia e te mau raau rarahi no te fare, ua piri te rima, te avae, e te tahi atu â mau melo o te tino aita e ravea no ratou, te pii hua ra to ratou reo i te taata ia tauturu mai, no te iti râ o te taata



i ora aita e ravea e faaora ia ratou ra, ua auê noa râ e tae noa'tu ua roohia mai ratou e te paruparu a pohe roa'tu ai. I muri a'e i te aueneraa te imi noa ra te feia i ora i to ratou mau fetii ma te mihi rahi, ua roohia mai ratou e te feia atoa i piri i raro a'e i te mau pueraa fare i te piti o te ati rahi, oia hoi ua haruru maira te miti, moe atura te mau oire i tahati i raro a'e i te are miti e 32 avae te teitei. I muri a'e i te reira ua mairi te ûa ma te puai rahi, toetoe roa'tura te feia i ora mai. Ua rahi te taata i pohe ua iti tei ora. No te ati rahi, te toetoe, te poia, te oto, te mihi, e te riaria rahi o te feia i ore i pohe roa ua nevaneva te aaui, ua tanuu haere tahaa noa te tahi pae taata na roto i te mau purumu, ua afai haere te tahi pae i te hohoa no te Mesia e no Maria ma te pure hua ia faaorahia ratou, e ua amuihia te auê o te feia tino pepe, e te mau pure e te mihi o te mau metua i taa ê i te mau tamarii e te mau tamarii i taa ê i te metua, te vahine ivi, te tara tane e te otare, e te tuhi o te feia ino e tae noa'tu ua roohia mai to taua fenua atoa ra e te riaria e te mätä'u rahi hau ê. I muri a'e i te reira ua ama te mau fare e rave rahi te tausani i te auahi, pohe roa'tura te taata e rave rahi i te pohe riaria auahi. Ua haamata'tura te mau eiâ i ta ratou ohipa ino e ua haru atura i te tao'a a te feia i pohe ma te haama ore. Ia iteahia te taata i te eiâraa, ua pupubihia aita haavaraa. Ua maue maira te mau manu amu tino e rave rahi te tausaniira e ua amu ratou i te tino o te feia i pohe i vai noa i roto i te mau fare e i nia i te mau purumu. No te poia rahi ua amu atoa te mau uri i te mau tino pohe i vai tanu-ore-hia i tera vahi e i tera vahi.

Ua tere oioi atura te mau pahi manuâ no Farani, e no Rusia, e no Beritane, e no Itali, e no Amerika i te fenua i pau e tauturu atu i te feia i ati e na ratou i afai atu hoê hanere tausani taata i te mau vahi e au ei haapuraa. Ua tauturu atoa atura te mau mataro e te mau faehau no taua mau pahi ra i te faaoraraa i te feia i piri i raro a'e i te mau

pueraa fare pau. Ua tere oioi atura hoi te arii no te fenua Itali, o Vitara Imanuela, e te arii vahine atoa, o Helena, e tauturu i te feia i roohia mai e te ati, e ua tere haere atura raua i tera oire e i tera oire e ati noa'e na tufaa fenua rahi i pau i te tamahanahanaraa i taua feia ati rahi ra. Tupu roa'tura te aroha o te feia ati ia raua no to raua mātā'u ore, te aueue noa ra te fenua e te mairi noa ra te mau patu fare i raro i te mau hora atoa, e te haruru noa ra te mou'a auahi ra o Etena e te pee ra te auauahi i nia mai roto mai i te apoo auahi i te tupuai mou'a.

Ua pohe roa te Tonitara Amerika, ua pau te mau pahi e rave rahi i roto i te mau ava, ua pau te mau fare pureraa nebenehe e rave rahi, pohe roa atura te mau episekepo e te mau tahu'a e te mau amuiraa ekalesia e rave rahi. Tera mai te parau a te tahi vahine i ora mai no te oire Mesina, ua na ô maira oia:

"Hoê noa iho parau e au ei faaite i te huru no taua ati ra, oia hoi o hate. Te taoto ra to te oire a haamata'i te aueueraa fenua. Ua ara vau i te aueueraa o to'u fare. Ua hantiuti te mau haamaramarama e ua mairi te mau mereti e te mau farii maa i raro mai nia mai i te vairaa ma te haruru rahi. Hoê minute i muri a'e ua hurihia vau i raro mai nia mai i to'u roi e ua huru pouri to'u mata i te puai o te mairiraa i raro; ua ite râ vau hoê noa iho ravea ia ora, oia hoi ia horo vau i rapae i te fare. Ua i te mau purumu i te taata. Ua horo te taata atoa i ore i pohe i rapae i te mau fare ma te haapao ore i te puai o te uâ, e aita to ratou e ahu ia ahu. Ua pii hua te reo auê i te tahi pae purumu e i te tahi pae purumu, i tera vahi e i tera vahi, e ua faaroo to matou taria i te auêraa o te feia i piri i raro a'e i te mau fare pau. Te aueue ra e te mairi atoa ra i raro te mau patu fare e ati noa'e te vahi i tiahia e matou ra, e aita to te hoê o matou e mana'o ora toe. Tei pihaiiho ia'u to'u mau taeae e ua perehahu haere noa matou na roto i te mau purumu e na nia iho i te mau pueraa fare a tae atu ai matou i te hoê vahi huru maitai ei haapuraa. Ua pepe to'u tino i te tahi mau ohipa rii no te tahi mau fare teitei i mairi mai i nia ia'u i to matou hororaa na te purumu. Ua neneihia matou e te mau taata ahu ore e rave rahi o tei horo noa na te mau purumu mai ia matou atoa te huru i te imiraa i te hoê vahi maitai e ora'i. Noa'tu te vahi ta matou i haere ra te mairi noa ra te mau fare i raro ma te haruru rahi. Ei reira ua haruru maira te miti e ua tae i te mau vahi atoa o te oire, e ua mana'o ihora

vau o te hopea roa ia. Ua haere noa maira te mau are teitei ma te puai rahi, e mea riaria te haruru. Ua maramarama roa te ra'i i te amaraa o te mau aorai e te mau fare nehenehe. Aita i mahia ua faaroo to matou taira i te haruru u'ana, ua ite to matou mata i te auahi i te peeraa i nia roa e ua aueue faahou ihora te oire. Ua parari te fare hamaniraa (gas) mata'i mori. Muri a'e ua tae atura matou i te mahora no te oire, tei reira e piti e e toru tausani taata i amuihia i roohia mai i te mehameha rahi, te pure ra te tahi pae, te auê ra te tahi pae, e te pii hua nevaneva noa ra te reo no te tahi pae, aita râ te hoê o matou atoa i ite noa'e e nahea ra matou i te rave e i te haere. Ua ite au i te mairiraa o te hoê fare rahi i fatata i te mahora, e rave rahi te ahururaa o te taata i moe roa i raro a'e i taua fare ra. Ei reira ua riro vau mai te taata pohe roa te huru aita vau i ite mata i te mau mea i tupu i muri a'e."

Ua na ô atoa maira te tahi taata i ora no te oire Palama:

"Ua faaarahia vau i te taоторaa e te haruru rahi e te aueueraa o to'u fare. Ua riro mai te mea ra e te taninito haere noa ra to'u fare mai te mau rima no te hui ra mata'i. Ua parari te pae fare patu e oi pohe vau i te hu'ahu'a repo no te patu i parari ra. Ua hipoa to'u mana'o, aita râ to'u tino i pepe, e ua tamata'tura vau i te horo i rapae i te fare, aita râ e ravea no te mea ua parari te paiumaraa e tei nia to'u piha i te tahua toru i nia. Ua imi au i te tahi ravea e i te tahi ravea, e tae noa'tu ua roaa ia'u te tahi taura e ua pou vau i raro na roto i te haamaramarama o te tahua toru i na nia i te taura. Ua apiapi te mau purumu i te hu'ahu'a fare parari."

Ua haamata'tura oia i te ohipa faaoraraa i te feia i piri i raro a'e i te mau fare, e aita i maoro ua oti roa e 86 tino taata i te umehia mai e a'na no raro mai i te mau fare i pau ua pohe roa ratou atoa, tei nia i to ratou mata te riarla rahi i roohia mai ratou ra.

No te rahi o te feia i pohe, aita i tia ia tanuhia to ratou mau tino hou te pê e tupu ai, e no reira ua tutuihia te mau tino taata i te auahi, e ua uenehia te mau pueraa fare i te mau raau faaore haua ino ia ore te haua ino ia faatupu i te ma'i a pahi ai te feia i ora.

No te haapaoraa Katolika te rahi o te feia i parahi i taua fenua i pau ra, aita râ te huru haapaoraa i haapaohia e te feia i parahi i te mau fenua cherisetiano, ua tauturu te

pope, te Porosetani, te ati Iuda e te "Moromona" e te feia haapaoraa ore atoa i te feia i ati ra. E 800,000 dara tei horoahia e te hau Amerika e ua milioni te moni i horoahia e te hui raatira. Ua tauturu te Ekalesia i Roto Miti ma te haponu atu i te moni ei hoo maa e te ahu na te feia ati e ua na reira hoi to te mau fenua Farani, Beritane, Alemaniam, Rusia, etc., etc. Na teie nei mau huru ati e faaore rii i te mârôraa o te mau haapaoraa a amui atu ai ratou i to ratou puai i te faaoraraa i te feia i roohia mai e te peapea. "Mea maitai roa te horoa'tu i te farii mai."— FARANI TUTERERA.

Te Ekalesia no Beritane

I te m. 1908, e 19 orometua no te ekalesia Porositane no Beritane tei faarue i to ratou faaroo e ua tomo atu i roto i te ekalesia Katolika no Roma. Na teie nei parau iti i faatupu ai i te uiraa: Nafea te tupuraa o taua ekalesia Porositane no Beritane?

I te tēnetere 16 i te ariiraa o Henere VIII no Beritane, ua taa ê te ekalesia no Beritane i te ekalesia Roma. Mai teie te huru o taua taa-ê-raa ra: E taata taiata te arii ra o Henere VIII, e ei haamahâ i to'na hinaaro vahine, ua titau oia ia haapae atu i ta'na vahine faaipoipo ia Katherine, e tia'i ia'na ia faaipoipo i te hoê vahine apî ia Ane Boleyn, o ta'na i hi'o hinaaro atura. Aita râ te pope Roma i faatia i taua haapaeraa vahine ra, e no reira ua riri roa o Henere VIII i te pope.

I mua rii mai, oia hoi, i te tau i patoi hua'i Lutero ma i te pope Roma, ua tauturu atu te arii i te pope i ta'na paeau e ua maruuru roa te pope ia'na i reira, e ua mairi ia'na i te i'oa hanahaha ra, "Te Paruru no te Faaroo," e mai reira mai â e tae roa mai i teie nei ua itea taua i'oa ra i nia iho i te moni no te hau Beritane. I muri mai râ, ua tupu te riri rahi o te arii i te pope, oia aore i faatia ia faarue i ta'na vahine; e ua orure ihora oia i te hau i te paeau o te



faaroo, ma te patoi u'ana atu i te mana o te pope. Ua faaore roa te arii i te toroa taradina o Wolsey, te taata toroa rahi no te ekalesia Roma i Beritane, a faariro hua'i ia'na iho ei upoo no te ekalesia no Beritane, e ua faatoroa ihora oia i ta'na i hinaaro i te mau toroa ekalesia.

Ua rave te reira arii i te mau mea taa ê e rave rahi. Ua tâpû taa ê atura oia i te upoo o ta'na mau vahine na nia noa i to'na iho hinaaro; ua haru noa oia i te tao'a i roto i te mau fare o te mau peresibutero, ua faarue i te pope e ua faatia i te hoê ekalesia na'na iho; ua roaa ia'na te parau haapaeraa vahine i te tahi taata toroa ta'na i faatoroa, e ua tiavaru ê atu oia i te taradina tao'a rahi ra ia Wolsey ia pohe i roto i te veve e te haama. Na roto i ta'na faatereraa ua haamauhia te ekalesia Porositane no Beritane ei ekalesia taa ê roa i te mau haapaoraa atoa e ei haapaoraa hoi na te hau inaha noa nei â. Pohe atura taua arii ra o Henere VIII i mata'uhia e i faaino-atoa-hia e te feia atoa i ite ia'na. No te parau tuatapapa teie nei mau parau o tei papaihia e te feia i ora i taua anotau ra.— BUTERA.

Te Mau Bapetizoraa i Mao

Te faaite atu nei matou i te mau hoa no TE HEHEURAA APÎ e ua bapetizohia e piti tane e e toru vahine i roto i te Ekalesia a Iesu Mesia i te Feia Mo'a i te Mau Mahaha Hopea Nei, i te amaa ra o Hao. E mau taata paari ana'e ratou, e no roto mai ratou i te haapaoraa Sanito. E haapii te hoê taata, o Tapuragi te i'oa, i roto i te haapaoraa Sanito, e e tauturu hoê ta'na vahine, o Taehau to'na i'oa, i raro a'e i te aratai tuahine o te Sanito i te fenua ra o Hao. Na Taipu (peresideni amaa o te Ekalesia i Hao) ratou i bapetizo, i te Tenuare i mairi a'e nei.

Ua mauruuru roa to te Ekalesia i te mea e, ua faafariuhia mai te tahi mau taata i roto i te faaroo mau. Te ite nei ratou i te parau mau, e te farii nei ratou i te reira, mai te oaoa e te mata'u ore.

Te Taata Maohi e to Ratou Tumu

E piti tere to te mau orometua "Moromona" i Tahiti nei e te mau fenua i fatata mai: Hoê. Ua afai mai matou i te evanelia mau a Iesu Mesia. Piti. Ua afai mai matou i te parau tuatapapa no to outou hui tupuna. O te Buka a Moromona te parau tuatapapa ta matou i afai mai.

Te ite nei tatou na roto i taua buka ra, i roto i te matahiti 600 hou te Mésia, ua faaue te Atua ia Lehi (te hoê taata parau-tia i Ierusalema) ia rave i to'na utuafare e e haere i roto i te medebara ra. Ua haapao ratou i te faaueraa a te Atua, e na roto i te mana e te aroha o te Fatu ua tae ratou i te pae miti; i reira ua hamani ratou i te hoê pahi; e oti a'era, reva'tura, e ua puhia-noa-hia ratou e te mata'i i na mahana e rave rahi, e ua tae atu ratou i te fenua i parauhia ra, oia hoi te fenua i haamaitaihia e te Atua no ratou. Ia ratou i tae i te fenua i parauhia (o Amerika taua fenua ra), faaapu ihora ratou i te fenua. Maoro rii a'era, ua tupu te orure hau e te parau-tia ore i rotopu ia ratou, amaha ihora ratou i roto i na nunaa e piti, te Ati Lamana e te Ati Nephi. No te parau-tia ore a te Ati Lamana ua tapaohia ratou e te Atua i te iri ereere, o te mau Inidia i Amerika. Te vai ra te hoê taata i rotopu i te Ati Nephi, o Hagota to'na i'oa. Te na ô maira te parau na taua taata ra (Alama 63: 5-8):

"E taata iimi noa o Hagota, i haere ai oia e i hamani ai i te hoê pahi rahi i te hiti o te fenua ra o Bounetifula, i pihaiho i te fenua ra i Desolationia, e ua tuu atura i te tai i te tooâ o te râ i pihai a'e i te fenua iti rairai e tae atu ai i te fenua i apatoerau ra. E inaha, e rave rahi o te mau taata o te ati Nephi tei tomo i roto ra, e reva'tura ma te mau huru maa e rave rahi, e na vahine e rave rahi, e te tamarii hoi, e fano tia'tura ratou i apatoerau. E hope a'era te toru ahuru e te hitu o te matahiti. E i te matahiti toru ahuru ma vau i hamani ai taua taata nei i te tahi atu â mau pahi. E ua ho'i maira te pahi matamua, e tomo atura e vetahi mau taata e rave rahi i te reira, e rave ihora ratou i te mau huru maa e rave rahi, e tere faahou atura i te fenua i te pae apatoerau ra. Eaita atura ratou i itea-faahou-hia. Te mana'o ra matou, ua paremo ihora ratou i raro i te tai. E fano atura te tahi â pahi, e te vahi i haerehia e ana ra aita matou i ite."

Te ite nei tatou na roto teie nei mau irava e ua haere te mau taata e rave rahi i nia i te mau pahi ta Hagota i hamani, e ua tere atura ratou i te pae i te tooâ o te râ, e aita i itea-faahou-hia. Uiraa: Ua haere ratou ihea? Pahonora: Aita e fenua i te tooâ o te râ no Amerika, maori râ i teie nei mau fenua oecania, oia hoi o Hawaii, o Hamoa, o Tahiti, etc. No reira te ite nei matou e huaai outou no ratou, e e huaai Lehi ma no Iosepha i hoohia i Aiphiti. II Nephi 3: 4.

I te taeraa mai o te mau popaa matamua i Tahiti nei, te rave ra to outou hui tupuni i te mau peu ati Iuda, oia hoi te peritome, te tusia ta auahi e te tahi atu â mau peu no te ture a Mose. Na vai i haapii ia ratou te reira mau mea, maori râ to ratou mau metua? No reira te ite nei matou e huaai mau outou no Iseraela. E homa, a oaoa i te mea e, ua afaihia mai te tuatapapa no to outou mau metua, e e tia ia outou ia ite i to outou tumu mau.—VARENE.

Te Pahonora

*I Faataehia mai i te Piha no "Te Heheuraa Apî"
no te Uiraa ra e,*

"UA TIA FAAHOU ANEI TE MESIA I TE POHERAA RA?"

"Te pahono atu nei au i taua uiraa ra. Teie to'u mana'o i nia iho i taua uiraa a TE HEHEURAA APÎ râ: 'E, ua tia oia i muri a'e.' Ua faaitehia i roto i Mareko 16: 6, i te pae hopea, o tei na ô maira e, 'Ua tia oia i nia, aore oia i ô nei, a hi'o na i te vahie ta ratou i vaiiho ia'na ra.'

"TEIHO A TAU, i Tiarei."

Te faaite nei te HEHEURAA APÎ e, ua tia roa te pahonora. O oia i parau e, "*Ua tia;*" aita râ oia i parau e, "*E, ua tia faahou.*" Te faaite atu nei matou e, aità i oti taua uiraa ra i te pahonohia. E tia i â matou i te mau pahonora.

"Eiaha e titau i te tao'a, i te paari râ, e inaha e heheuhia mai ia te mau mea hohonu a te Atua ra ia oe nei ei reira oe e faufaahia ia." B. F. 6: 7. B. F. S. 6: 3.

Te Pure Mau

Tei roto ia te mau ohipa ta te Atua i faaue mai i te taata nei, e rave rahi te huru, oia hoi teie te tahi: A rave teie a feruri; a imi; a hi'opoa; a faatura atu i to oe metua tane e to oe metua vahine, e e rave rahi atu â te ohipa ta'na i faaue mai ia tatou nei. Teie râ hoi te tahi ohipa ta te Atua i parau mai ia tatou e rave, oia hoi te pure, e na te pure hoi e faafatata'tu ia tatou i te Atua i te paeau varua ra, no te mea e ite tatou i te hanahana rahi, e e faateitei-atoa-hia to tatou mana'o, e tia ia ia ite i te tumu e te faufaa no roto mai i taua ohipa ra.

Ia faafatata tatou i te Atua e itea hoi to tatou paruparu e to tatou hupehupe i mua ia'na, area râ te haapii mai nei te reira ia tatou nei, te ravea e noaa te mau mea i ere, oia hoi te maa maitai ia faatupu to tatou faaroo papu ia'na ra.

Ia farere tatou i to tatou hoa i te paeau tino nei, e haapao maitai tatou i to tatou paraparauraa ia'na, ia ore ia hape e e faaherehere maite ia'na na roto i te parau mau e te ohipa maitatai ia ore e tupu te haama. No reira, eaha te mea e ore ai tatou e haroaroa maitai ai i to tatou haereraa i mua i te aro o te Atua i te aniraa atu ia'na i to tatou mau hinaaro? Te hinaaro nei oia ia tatou e ani atu ia'na no te mau mea e au i te paeau tino e te paeau varua atoa hoi, mai te au i te tamarii e ani atu i to'na metua i te hoê mea ta'na i hinaaro. Te hinaaro ra te Atua ia tatou ia imi ia'na, e tuu atoa i ta tatou ohipa teiaha i nia iho ia'na ra, no te mea no to'na ite rahi e tia noa ia'na ia hi'o i te mau mea atoa e au ia tatou. Ua parau mai oia e, e ani e noaa ia ia tatou, mai te mea ra e, e ani atu ma te faaroo mau e te auene ore, e tamata tatou i te reira ia'na ra, e iriti oia i te mau haamaramarama o te ra'i ra, a ninii mai ai i te tao'a rahi roa ei maitai no tatou. Ia ani atu tatou i te Atua e ani atu ma te faaroo e ma te mana'o ra e, na te Atua e tauturu mai.



I to tatou mau haaputuputuraa, aita e tia ia faaî i to tatou mana'o i te mau mea riaria e te mau mea au ore; e haere mai râ ma te aau mâ e te haehaa ia tia ia ani atu i te Atua i te mau mea ta tatou i hinaaro. Ia faatiahia râ te mau mea riaria e te mau mana'o faufau ia ô mai i roto ia tatou nei, e paraparau paha tatou na roto i te mau parau faufau, ia tia noa i te mau taata e faaafaro mai ia tatou i teie mau parau viivii. "Area ta te vaha e haapuai mai, no roto mai ia i te aau, o te mea ia e viivii ai te taata." Mat. 15: 18.

Na o maira te Fatu, "Ho mai te maa e au ia matou i teie nei mahana," e no ananahi e na reira atoa ia, no te mea e tauturu mai â te Atua i te mau taata itoito ia roaa mai teie nei mau mea. Ua parau mai Paulo e, e pure atu i te Atua ma te faaea ore, e ere mai te mea e, tia noa i nia e pure ma te faaea ore, e pure râ i roto i te aau, i roto i te ohipa, e i nia i te purumu, i tua e aore râ i roto i te fare, a tamau noa i te aroha i roto i te aau. E' na te aroha hoi e aratai ia tatou i te Atua e tae atu i te ora, e e faanehenehe i ta tatou mau lamepa no te faaipoiporaa apî. Ia tae i taua mahana ra, e ite mai te Atua ia tatou e au noa ia tatou ia parahi i raro i pihaiho ia Aberahama, Isaaka, e Iakoba, e i te mau taata i ora atoa i taua tamaaraa faaipoiporaa a te Fatu ra.— SOLONA.

Teie te ohipa i oti i te mau orometua Moromona o tei poro haere i te evanelia i te fenua ra o Beritane i te matahiti i mairi a'e nei: 5,500,000 vea rii ua horoa-noa-hia i te mau taata, 160,000 buka iti i operehia, 1,200 taata tiahapa i bapetizohia. Tera'toa mai te ohipa i oti ia ratou i te neneihia i te matahiti i mairi a'e nei: 6,133,000 vea rii ua neneihia, 1,225,000 buka iti, 140,000 buka huru rahi, e 153,000 buka rahi. E te tahi atu â mau vea rii i neneihia e te vea huru rahi i te mau avae atoa ei haamaramarama i te mau taata i nia i te pae evanelia.

Te Mau Parau Api.

I te 8 no Febuare ua haamata te hau Farani i te hamani i na pahi manuâ e piti.

Ua horoa mai te hoê taata, o Dunekana to'na i'oa, i na moni e 300,000 dara i te faatiaraa i te hoê haapiiraa i Lonedona.

I te tereraa o na taata 19 i nia i te hoê boti i te oire ra o Leco, ua huri te boti i tua e ua pohe ratou atoa, 17 vahine e e piti tane.

Te opua nei te hoê socaiete i Amerika e patu i te hoê fare, e 909 pie i te teitei, oia hoi e 62 tahua. E riro ia teie nei fare ia oti roa, te fare rahi roa i roto i te ao nei. E pau i nia i te hamaniraa, te moni e 10,000,000 dara.

E hamani te hoê Socaiete i te oire ra o Washington i te hoê fare rahi roa, no te machine paraparuraa na roto i te reva nei. E patu ratou i teie nei fare, i na pie e 400 i te teitei, e tia ia e paraparau noa e 3,000 maile i te atea i te po e i te ao, noa'tu te huru no te mahana, e mea nehenehe ia i paraparau noa.

I te 22 no Tenuare i re oire Pretoria, ua faarue na taata Tinito e 800 i ta ratou raveraa ohipa i roto i te hoê apoo tao'a. Ia tae i te matahiti apî ua parau mai ratou e, "Aita roa matou e rave faahou i taua ohipa ra." No reira ua tupu te orure hau i rotapu ia ratou, e i muri iho ua haere mai te tahi mau motui, e ua pupuhi pohe roa ratou e 6, e ua puta e 15 i te ofai pupuhi.

I te 22 no Tenuare i te fenua ra o Beritane, ua rave na taata i te ohipa i raro i te hoê roto pape, e i to ratou raveraa i teie nei ohipa ua parari teie nei roto ua mairi te fenua i raro e ua horo noa mai te pape i rapae ma te haruru rahi, e i muri iho ua ite teie nei mau taata rave ohipa i taua pape ra. Aita nehenehe ia ratou ia horo atu no te mea ua fatata roa mai te pape, e ua pohe ratou atoa i roto i te pape, 10 taata popaa, e na taata maohi e 150.

I te 21 no Tenuare i te fenua ra Philipine, ua taparahi te tahi mau etene i te hoê aiû, no te mea ua parau mai ratou e, o te mau taata i rave i te hoê vahi no taua aiû ra, aore roa ona e roohia i te varua ino, e muri iho ua tapu ratou i te tino no teie nei aiû i te mau vahi nainai roa, e ua horoa atu i te reira i te mau taata, ei tapao ia e e paruruhia ratou atoa e taua mau vahi ra i te diabololo. I te faarooraa te mau taata no te hau i teie ohipa ta ratou i rave, ua huri te mau motui ia ratou i roto i te fare auri, e i muri iho ua faaroo te mau motui i te parau ra e, ua rave teie nei mau etene i teie ohipa ma te ite ore te hara ta ratou i rave nei, no reira ua tuu-faahou-hia te mau etene i rapae ma te parau e, eiaha e rave faahou i taua ohipa ra.

Ua horoa atu te hau Amerika i na moni e 29,000,000 dara no te hamaniraa i na pahi rahi roa e piti.

I te 1 no Febuare ua faataa te hau Amerika i na moni e 500,000 dara i nia i te hamaniraa i te mau pahi opupu no te tama'i.

I te 8 no Febuare ua ora mai te hoê taata, no to'na ra vahi i pirihia'i oia i na mahana 37 i te ati rahi o Itali. Tirara atu ai ta'na ra maa i taua na mahana ra te monamona rii e te ava.

I te 27 no Tenuare i te oire ra o Lonedona, ua haere te hoo no te olive i nia e 40 per cent, no te mea ua manuia ore te mau faaapu olive i te fenua ra o Farani, Paniola e Itali atoa.

Te faatia nei te hau Amerika i na machine paraparauraa na roto i te reva e 250, no te mea te hinaaro nei ratou e, e haati te mau basileia rarahi ia'na, ia ite oia i te mau parau apî.

I te 19 no Ditema ua parau mai te hoê ratira rahi o tei faatere i te ohipa i Panama, o Kuenele to'na ra io'a, e oti roa te ohipa i reira i na matahiti e ono, no te mea e mea itoito roa te mau taata i te raveraa i te ohipa. Te rave nei e 22,000 taata i te ohipa i reira.

Ua faatupuhia e te hoê tamahanahanaraa no te hoê vahine ruau, o tei tae i to'na matahiti 105, i te fenua ra o Amerika i te oire ra o Midland Park. E mea itoito ona i te raveraa i te mau huru ohipa. E ono tamarii to'na, e te matahiapo e 82 to'na matahiti.

I te 31 no Tenuare ua iritihia mai na taata e 24 no roto mai i te hoê apoo tao'a i to ratou raveraa i te ohipa i roto i taua apoo ra. Ua mairi mai te fenua i raro, e no reira aita e nehenehe ia ratou ia haere i rapae, no te mea ua i roa te apoo i te repo, no reira ua parahi noa ratou i roto i taua apoo ra i na mahana 10 ma te maa ore.

I te haereraa no te tahi pereoo auahi i te tufaa fenua ra o Colorado i te fenua o Amerika, ua farerei mai te tahi pereoo auahi, tupai raua te tahi i te tahi, oia hoi ma te ite ore ia raua raua iho, i te haere ra mai i nia iho i te purumu hoê. Ua i roa te tahi pereoo i ta tao'a, e te tahi no te fauta noa i te mau taata, e no reira tei nia iho i te pereoo no te taata e 69, e ua pohe roa na taata e 68. Ua ora te hoê noa iho tamahine. Ua iteahia teie nei tamahine i raro a'e i te tino pohe no to'na ra metua vahine. I muri iho, ua haamata te auahi i roto i teie na pereoo, e aita i maoro ua pohe i te hiona o tei vai noa i te pae purumu.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank Cutler, Imprimeur,

Rue Bréa et de la rue Dumont d'Urville, Papeete, Tahiti.